

Daic Dungx Xus

Meanh xaux, Jazjinh qyuh raanz baussuc gueh hoongl. Lix baiz ndeeul, baussuc xic riangz Jazjinh nauz: “Jazjinh, gul rooxnyiel bux bux duc nauz mengz guaail laauhoh, yac xaangh gacloox bux wenz. Gul dax mengz gueh haec soongl baus yah dul daic dungx xus bees!” Jazjinh xic reeul ndooil.

Lix ngonz ndeeul, Jazjinh riangz baussuc nauz: “Baus, haadt nix woois bail baangx dah gueh saag, ndael dah lix byal laail laauhoh, hohrauz bail degt byal bees.” Baussuc haanl: “Bail las.” Hohdeec xic dez guh jooil, gues, beanz bail baangx dah degt byal. Bail dangz baangx dah baussuc reenl byal, deel xic doodt haaiz xus heenz dah. Ieh xic rongz bail ndael dah degt byal aangh leeux.

Jazjinh xic riuc gal haaiz baussuc, gueh raag seedt bail dangz raanz hox heec leeux. Deel xic soohnyaangh bail mboodk wal dul. Yahsuc yius reenl Jazjinh, xic hudt: “Jazjinh, mengz hac mboodk wal dul guehmaz mus? Mengz banz bah baic bax?” Jazjinh xic haanl: “Yah, miz hoz bais! Baussuc dogt dah daail bais. Gul jaus deel miz ndaix, waz

ndaix gal haaiz ndooil. Gul xic seedt dauc raanz aul wal dul bail laangx his deel.” Yahsuc xic wange leeux, deel ndingh daic ndingh seedt bail baangx dah. Jazjinh xic geack gaais wal dul guas ronl sooh bail dangz baangx dah goons yahsuc.

Baussuc reenl Jazjinh geack wal dul dauc dangz baangx dah xic hams: “Jinh, mengz geack wal dul dauc jiez nix guehmaz mus?” Jazjinh haanl: “Baus, jacobanh woois henc bail naangh genz deec angh eex, eemh reenl ndael mbaanx ooh honz foonx leeux, woois xic seedt bail dangz raanz, reenl fiz reemc raanz baus. Yaangz ndooil aul miz ndaix, woois xaax singl ndaix gaais wal dul ndooil. Yahsuc yac ngaix fiz byaul daail bais.” Baussuc xic soohnyaangh seedt bail raanz, ndingh daic ndingh bail. Jazjinh xic bail riangzlangl baussuc. Baussuc hal yahsuc qyuh jaangl ronl dungx bungz. Soongl bux daic dungx xus. Jazjinh xic goms bas reeul ngox ngaax leeux, baussuc xic ndiabk dangz gaais haas deel dax Jazjinh deec, xic daic miz deg reeul.

Ngaix Jangl Xus Raabt

Lix ngonz ndeeul, baussuc nyaz Jazjinh laail, xic aul Jazjinh jangl xus ndael raabt, dez bail weenl xus gool faix heenz ronl ndeeul. Lac gogt gool faix deec lix gaauh rongc ndeeul. Lac aul Jazjinh xuangs bail ndael rongc deec gueh daail, mizguanc hohdeec weenl Jazjinh xus byaail faix goons, xic daaus bail raanz genl hauxngaiz.

Guas ndaix neec ndeeul, lix baus ndeeul xingl max dox nganz guas jiez deec, Jazjinh reenl baus deec guas, xic xangcih ail rianh leeux. Baus deec rooxnyiel xic hams: “Aih, laaux xooz, mengz guehmaz qyuh ndael raabt mus?” Jazjinh haanl: “Ail gaabt gaabt jangl xus raabt xic ndil, ail gome gome jangl xus rongc xic ndil.” Baus deec xic nauz: “Gul yac ail laail, xaaml mengz uah haec gul bail qyuh ndael deec neec ndeeul.” Jazjinh haanl: “Miz banz, woois haslix ail laail.” Baus deec daaus nauz: “Xaaml mengz gox, gul ail qyah qyuh jaxxiz bais.” Jazjinh xic haanl: “Yac banz, mengz xingh xaaml woois, woois reenl mengz deg bux jees, ail naanh laail, xic uah haec mengz qyuh las!” Ieh Jazjinh xic nauz haec baus deec xuangs deel dauc lac, aul deel ooh ndael raabt. Ieh

Jazjinh xic jangl baus deec xus ndael raabt, xic xaauh baus deec bail genz. Deel xic nangh max baus deec deeuz bais.

Mbanh nix, baussuc daaus dauc dangz jiez deec, aul xuangs Jazjinh bail ndael rongc. Baus deec xic gaangc has heeuh rianh leeux, nauz: “Nghoh buz sel Jazjinh, nghoh buz sel Jazjinh.” Baussuc xic nauz: “Yees, Jazjinh roox gaangc has leex!” Ieh xic xuangs baus deec bail ndael rongc daail bais.

Baussuc daaus bail dangz raanz, xic reenl Jazjinh hal dol nganz. Baussuc xic hams: “Jinh, mengz dogt bail ndael rongc daail baic las! Mengz gueh dangclaez dauc dangz jiez nix mus? Dol nganz nix guas jiez laez dauc mus?” Jazjinh xic haanl: “Baus, mengz reenl woois banz dangcnix, mizguanc mingh woois laaux ges. Mengz xuangs woois bail ndael rongc deec, ndael deec lix nganz laail. Woois xic ndaix guas ndael deec dauc.” Baussuc xic ngax ndooil.

Degt Raaih

Meanh xaux, Jazjinh qyuh raanz baussuc gaail reengz. Lix ngonz ndeeul, baussuc heeuh Jazjinh bail bool riangz degt raaih, yac lix wenz laail bail deeml. Hohdeec bail dangz bool, baussuc xic xaus Jazjinh bail damh mboongl, reenl duez raaih qyuh jiez laez xic heeuh haec deel. Baussuc xic gueh laaux nangh jaangl naangh weedt galgox gaancxaaul ndooil. Jazjinh bail dangz jiez mboongl nyal deec, ral naais leeux, miz reenl duez raaih laez, deel xic henc bail gool faix ndeeul iehnaais, ninz qyuh jaangl ngaamz faix deec.

Guas ndaix nec ndeeul, baussuc heeuh Jazjinh: “Jazjinh haih! Eh Jazjinh! Mengz reenl raaih miz mus?” Jazjinh xic byaadraad ducseedt laaux, lac dogt gool faix dauc lac hac ndil. Deel yius reenl lix duez mod raaih gool faix bail genz, deel xic haanl baussuc: “Raaih bail genz baic geh.” Baussuc hal boz wenz degt raaih deec xic seedt riangz ndongl faix bail genz. Bail dangz genz ieh, yius miz reenl duez raaih, xic daaus heeuh Jazjinh: “Jazjinh, raaih qyuh jiez laez mus?” Jazjinh xic daaus haanl: “Raaih bail lac baic geh.” Hohdeec xic daaus seedt riangz ndongl faix bail lac, yius miz reenl

duez raaih, baussuc daaus heeuh Jazjinh moos: “Jazjinh, hohdul miz reenl raaih geh!” Jazjinh haanl: “Raaih daaus bail genz baic geh.” Hohdeec daaus seedt riangz ndongl bail genz, haaix ooh mes dangc leeux, yac miz reenl duez raaih. Baussuc daaus heeuh: “Jazjinh, raaih bail jiez laez baic mus?” Jazjinh haanl: “Raaih bail lac baic geh!” Hohdeec daaus seedt riangz ndongl bail lac, yac miz reenl duez raaih.

Baiz nix, baussuc xic bail dangz jiez Jazjinh deec, yius reenl Jazjinh ninz qyuh jaangl ngaamz faix, baussuc hooznyaz xic beedk Jazjinh: “Bah saag mengz, raaih qyuh jiez laez mus? Nauz haec mengz damh mboongl ral raaih lez maz.” Jazjinh xic ducseedt laaux, deel xic heeuh baussuc: “Baus heh baus, mengz dauc eemh, raaih bail genz bais, raaih bail lac bais.” Baussuc xic wix Jazjinh nauz: “Gul nauz haec mengz eemh raaih, mengz guehmaz xic eemh duez mod mus leex?” Jazjinh xic nauz: “Woois nauz miz longl has! Raaih bail genz, woois xic heeuh ‘raaih bail genz.’ Raaih bail lac, woois xic heeuh ‘raaih bail lac’ mbaangx las!” Baussuc xic qyuh lac gogt gool faix xams damh, ndilmaz lac aul eeul Jazjinh. Jazjinh xic reeul banz nyangx banz nyieh.

Duez Mooil Haaix Neengz Haec Duez Lingz

Lix ngonz ndeeul, duez lingz neec ninz jaangl ngonz. Lix duez neengz ndeeul dauc duh ndangl deel, duez mooil neec yius reenl, soohnyaangh dauc haaix duez neengz. Duez lingz neec banz henz ndanghgaanx. Deel rooxnyiel jeedt xic sooh runs dauc, nauz: “Mengz haaix gul mus maz!” Duez lingz neec miz xac duez mooil nauz. Deel xic aul haaix daaus deenz. Duez mooil neec ndillaaul, sooh seedt bail raanz. Duez lingz laih bail dangz basdul raanz duez mooil, duez lingz nih: *Mengz qyox, xez laez gul yac aul haaix mengz daaus ndeeul!*

Ngonz langl, duez lingz rooxheeh duez mooil qyuh ndael rih daanl hauxdais. Deel neeh neeh byaac bail dangz xic jazjaz lac aul haaix, sooh lix hingl heeuh guas baaih lac dauc: “Mooil neec, dauc lac nix baangl gul nyamz neeh.” Duez mooil neec xic nauz: “Ox, bail bais.” Duez mooil neec xic bail baangl duez yuangz dez nyiec bail raanz bais. Duez lingz neec nih: *Laih miz hoz bais, xac daaus langl xaaux haaix.*

Lac laabt, duez mooil neec qyuh ndael naz logt legbaag, duez lingz neec daaus neeh neeh gueh raag bail dangz heenz

ndaangl duez mooil, jazjaz lac haaix, daaus rooxnyiel duez ducrec nauz: “Hooih, duez lingz neec, mengz dauc baangl gul logt legbaag maz?” Duez lingz hac nauz: “Gul dauc haaix duez mooil.” Mizguanc deel miz nauz ooh bas. Ieh deel xic bail riangz hohdeec logt legbaag. Xez daih legbaag deec, duez mooil nauz: “Soongl bux rauz dungx ruaaml banz miz?” Duez lingz haanl: “Banz.” Duez lingz gah qyuh ndael saml deel nauz: *Gul guehmaz miz haaix deel xic riangz deel dungx ndil nis?* Ieh duez lingz neec xic miz haaix duez mooil, riangz duez mooil dungx jaiz bais.

Duez Mooil Neec Maaic Byooml

Lix duez mooil neec oonh ndeeul, mac deel xex ndaix jongs beah wal ndeeul haec deel. Deel nauz: “Jongs beah nix ndiljaiz laail, gul lac aul deenc!” Ieh deel xic deenc jongs beah wal deec xus ndaangl deel aangh leeux. Mizguanc deel oonh laail, gueh dangclaez deenc yac deenc miz ndaix. Deel xic hooznyaz leeux.

Mac deel nauz: “Aul haec nuangx deenc ieh bais, ndaangl deel neec geh ndaangl mengz.” Duez mooil neec deec xic qyox jongs beah deec baiz dal ndeeul, sooh riangz mac deel nauz: “Miz, gul hac deenc, gul hac deenc.” Mizguanc deel deenc miz ndaix.

Ngonz deec, deel xic ruangh leeux, duez lingz neec xic hams deel: “Mengz hac aul ndaangl mengz gueh byooml maz? Miz genl haux xic byooml bais, jongs beah wal nix xic deenc ndaix bais.” Duez mooil neec xic nauz: “Gul xic miz genl haux.” Duez mooil neec oonh xic jic ngonz miz genl haux. Deel qyuh ndael saml nauz: *Miz genl haux xic roox byooml.* Ngonz deec deel dungx ieh laail guas, haaix ramx dal rongz

dauc. Mac deel reenl banz dangcnix, xic riuc baanz biagt bail dies xus dooisnac deel. Biagt deec waanl laail, deel xic genl leeux bais. Genl ieh dungx daaus laaux, jongs beah wal deec haslix deenc miz ndaix.

Duez mooil neec daaus ral yaangz moos dauc gueh byooml. Deel bail jiez gaail iel deec xex aul gaais iel genl gueh byooml deec dauc genl. Deel genl ieh, ngonz ndeeul bail seezsoh jic daaus, dungx yac jeedt, deel rooxnyiel naanh laail xic miz genl iel deec bais.

Lix duez rog ndeeul dauc hams deel, deel xic lenh gaais suans aul ndaangl gueh byooml deec haec duez rog. Duez rog xic nauz: “Mengz dol seedt neeh, ndaangl mengz xic byooml bais.” Baiz nix deel idt ngonz duc bail seedt. Seedt ndaix xib jic ngonz, qyox jiangs reenl byooml geh bais. Deel xic aul jongs beah wal deec dauc deenc, haslix ndeedt raangc dis miz ndaix. Mizguanc deel yac aangh leeux. Deel nauz: “Gul aul seedt ndianl xeengx beens dangz ndianl ndaadk, gul xic deenc ndaix bais!” Guaslangl jongs beah nix xic dangz deel deenc bais.

Miz Haec Aul Ndooil

Meanh xaux lix baus ndeeul bail aul fenz, deel bail dangz baangx dah xic haaix waanl dogt bail ndael dah aul miz ndaix, deel xic qyuh jiez deec daic. Lix baus jees ndeeul byaaic dauc dooisnac deel hams: “Mengz bungz yaangzmaz suans mus?” Deel xic lenh haec baus jees deec. Ieh baus jees deec xic juangh bail ndael ramx ndaix fah waanl jiml ndeeul dauc haec deel, hams deel: “Fah nix deg waanl mengz maz?” Deel haanl nauz: “Miz deg, miz deg.” Baus jees deec daaus juangh bail ndael ramx ndaix fah waanl nganz ndeeul dauc, hams deel: “Fah nix deg waanl mengz maz?” Deel haanl nauz: “Miz deg, miz deg.” Baus jees deec daaus juangh bail ndael ramx daaus daz saaml, ndaix fah waanl faz ndeeul dauc, nauz: “Fah nix aanh deg waanl mengz bais.” Deel haanl nauz: “Deg loogt, deg loogt. Fah nix deg waanl gul.” Baus jees deec reeul nauz: “Mengz deg bux wenz saml sooh ndeeul, fah waanl jiml nix gul xic siangc haec mengz bais.” Nauz leeux, baus jees deec xic soohnyaangh miz reenl bais, miz rooxheeh deel bail baaih laez. Baus deec daaus dauc dangz mbaanx, xic baus gaais suans deel deec haec

leeuxboz. Ieh deel xic aul fah waanl jiml deel deec bail weanh aul haux banl haec bux hooc.

Lix bux wenz daanc xeenz ndeeul rooxnyiel nauz suans nix ieh, deel xic bail baangx dah weenh fah waanl deel bail ndael dah. Ieh deel xic nangh heenz dah daic. Lix baus jees ndeeul byaac dauc hams deel: “Mengz bungz yaangmaz suans mus?” Deel xic lenh haec baus jees deec. Ieh baus jees deec xic juangh bail ndael ramx ndaix fah waanl faz dauc, hams deel: “Fah nix deg waanl mengz miz?” Deel haanl nauz: “Miz deg, miz deg.” Baus jees deec daaus juangh bail ndael ramx ndaix fah waanl nganz dauc, hams deel: “Fah nix deg waanl mengz miz?” Deel haanl nauz: “Miz deg, miz deg.” Daaus daz saaml baus jees deec ndaix fah waanl jiml dauc. Bux daanc xeenz deec sooh reenl xic qyaabk aul dauc aangh leeux. Deel nauz: “Fah nix deg waanl gul, fah nix deg waanl gul.” Baus deec reeul nauz: “Mengz deg bux wenz daanc xeenz ndeeul, mengz lac dogtnaanh bais.” Nauz leeux, baus deec xic bians banz nog ndoongh ndeeul miz reenl bais. Fah waanl jiml deec yac bians banz naamh bongz ndooil. Bux wenz deec ndiabk aul fah waanl jiml ndeeul, guaslangl dangz fah waanl ndaanglgaus deel yac miz ndaix. Gulsel nix deg

soonl, miz haec gacloox feax, gacloox feax dangz gaais
ndaanglgaus lix deec duc ngaix aul deeuz.

Rog Gaisgail Saml Sooh

Meanh xaux, lix ndongl faix laaux ndeeul. Jaangl ndongl faix deec lix gal ronl neec ndeeul. Lix ngonz ndeeul, lix baus jees ndeeul byaaic gal ronl neec deec. Deel byaaic bail byaaic bail. Byaaic miz ndilriz xic byaadk bais. Duez rog gaisgail sooh yius reenl baus jees deec byaadk, deel xic heeuh: “Leeuxboz dauc baangl geh, jiez nix lix baus jees ndeeul byaadk bais.”

Rooxnyiel rog gaisgail heeuh, jongs duez duez qyuh ndael ndongl deec xic seedt dauc dangz. Lix duez xaangx, duez lingz, duez raaih, duez max. Hohdeec leeuxboz dauc dungx baangl, neeh neeh qyaux baus jees deec guas basnaamh dauc genz. Baus jees deec doolsiel hohdeec, nauz: “Aangh bais, aangh bais.” Daus riangz hohdeec nauz: “Gul yac aul baangl hohsul idt bux gueh yaangz suans ndil ndeeul.”

Baus jees deec riangz duez xaangx nauz goons: “Mengz rooxheeh ndaanglgaus mengz jiez laez miz ndil miz? Gul rooxheeh baangl mengz xooih.” Duez xaangx rooxnyiel, soohnyaangh mbidt ndangl bail heenz nauz: “Gul reenl

ndaanglgaus gul jiez laez duc ndiljaiz.” Baus jees deec daaus hams duez lingz. Duez lingz aul fengz gomh daaix nauz: “Gul reenl ndaanglgaus gul miz banz dangclaez.” Baus jees deec daaus hams max. Max mbidt nac bail heenz nauz: “Gul idt ngonz eemh jiangs duc reenl gul ndiljaiz laauhhoh.” Baus jees daaus hams raaih: “Mengz nis?” Raaih haanl: “Gul oonh neeh, mizguanc yac ndiljaiz ndais, miz lix yaangzmaz miz ndil.”

Dangz saadkbyaail, baus jees deec hams rog gaisgail. Xez deec rog gaisgail eemh sianc deel nauz: “Sianc gul qyahfaz laail, xaaml mengz baangl gul xooih sianc gueh ndiljaiz neeh banz miz banz?” Baus jees deec reeul, ngaag jauc nauz: “Gahdamx rog gaisgail lingx ndaanglgaus deel lix jiez qyahfaz. Banz, gul aanh baangl mengz.” Baus jees deec nauz leeux xic qyogt ndael ndaangl deel ndaix gaais byeensbiz neec ndeeul dauc, neeh neeh saabt xus sianc rog gaisgail. Iehxic baus jees deec soohnyaangh deez bais.

Baiz qyaabt dal ndeeul sianc rog gaisgail soohnyaangh ndiljaiz leeux. Dalngonz xeeus deel xic banz laail yaangz wal ndiljaiz. Baiz nix jongs duez ndooil qyox dal wal leeux. Hohdeec xingh hanh sianc rog gaisgail ndiljaiz, hohdeec yac

miz rooxheeh bail jiez laez ral baus jees deec, xic qyeenh
leeux. Xaab xez deec dauc, rog gaisgail xic lix sianc ndiljaiz
bais.

Bail Qyox Nyiel

Xez gul haslix neec deec, rooxnyiel bux laaux nauz: “Nyiel lix ramx laail, guaangs, yac lix ruez guas ndael ramx.” Xaab xez deec dauc, gul xic xeenh ndiabk aul bail qyox nyiel, mizguanc miz rooxheeh gueh dangclaez bail. Ngonz bail ngonz xic guas, bil bail bil xic guas, yac miz ndaix reenl nyiel.

Qyuh xez gul ndaix xib ngih saaml bil deec, raanz gul lix bux jaec ndeeul gueh raanz moos banz, raanz gul xic bail hooh raanz deel. Raanz deel liez heenz nyiel miz saauh laez jail. Gul rooxnyiel nauz xic aangh laauhhoh, hac ndaix bail eemh nyiel bais.

Dangz ngonz bail hooh raanz deec, hohdul xic ooh guas raanz bail, byaaic ngonz laabt xaaux bail dangz raanz bux jaec. Hohdul bail dangz, bux jaec xic aangh laauhhoh. Dangz ngonz langl rooh raanz bux jaec xic raiz hohdul bail genl haux ngonz laabt. Bux laaux riangz hohdul nauz ieh, miz haec hohdul gah bail jiez laez, maaic bail jiez laez duc aul lix bux laaux bail riangz. Qyuh ngonz deec, jongs bux jaec

gueh gaais waanl raiz hohdul, mizguanc hohdul genl miz waanl, wooil hohdul meangh aul bail qyox nyiel. Hohdul xic xeenh degt boz bux laaux dez hohdul bail.

Haadt langl, boz bux laaux ngaix miz ndaix, xic dez hohdul bail qyox nyiel. Xez hohdul lac dangz heenz nyiel deec, gul yius reenl yaangz ndeeul qyuh jiez deec mooz leeux. Gul xic heeuh nauz: “Hohsul qyox! Ndaagt baangc waaiz ninz qyuh jiez deec.” Hohdul xic seedt bail dangz jiez deec, yius reenl lix rinl qyuh jiez deec mooz leeux, yac miz deg duez waaiz.

Byaaic bail dangz heenz ramx, qyuh heenz baaih nix, qyox bail baangx unx, yius reenl bux wenz laaux lumc duez gais nic ndooil. Hohdul daaus qyox reenl gaais ramx deec miz byaaic, xic weenh mbahyaangz bail ndael ramx. Gaais hohdul weenh deec, xic soohnyaangh lail deeuz. Hohdul daaus qyox bail baangx unx, yius reenl yaangz ndeeul qyuh genz ramx, neeh neeh byaaic dauc xus hohdul. Gaais qyuh genz ramx deec ndingh dauc ndingh laaux, mal dangz reedt jaec hohdul xic deg bux wenz ndeeul gaaul saz.

Leeuxboz hohdul xic qyuh heenz ramx guehxamz ndilmaiz leeux. Qyuh xez dalngonz lac dogtxoongh deec, boz bux

laaux deec xic leez hohdul daaus bail raanz, hohdul xic miz
ndaix miz riangz hohdeec daaus bail.

Wenz Degt Daus

Meanh xaux lix bux wenz ndeeul saml ndil laail, deel deg wenz degt daus. Deel degt daus ndaix jongs duez yeeh ndael bool deec laail, xic banl haec leeuxboz genl. Lix ngonz ndeeul deel bail degt daus yius reenl duez romh ndeeul gamz duez ngeaz neec ndeeul, duez ngeaz neec deec heeuh jaus mingh. Bux deec xic ndaix nasniec haaix duez romh deec, duez romh xic xuangs duez ngeaz neec deec dogt dauc lac.

Duez ngeaz neec deec xic doolsiel deel, ieh xic riangz deel nauz: “Mengz riangz gul bail raanz gul, diec gul deg weangz, deel aanh aul mbahyaangz deenzanl mengz. Diec gul lix mbahyaangz laail, maaic mengz aul yaangzmaz yac banz.” Mizguanc bux wenz saml ndil deec miz aul yaangzmaz. Duez ngeaz neec deec nauz: “Mengz yaangzmaz duc miz aul maz? Ndael bas diec gul lix need rinl ndeeul. Xaamx mengz lix need rinl deec xus ndael bas, duez duez gaangc haaus mengz xic rooxnyiel.”

Bux wenz deec ndiabk, xaamx aul need rinl deec yac banz. Ieh bux wenz deec xic riangz duez ngeaz neec deec nauz:

“Yaangzmaz gul yac miz aul, mizguanc mengz jaiz songs mbahyaangz haec gul, mengz xic aul need ndael bas diec mengz deec haec gul, banz miz banz?” Duez ngeaz neec deec xic ndaix need rinl deec haec bux wenz deec. Duez ngeaz neec yac riangz deel nauz: “Miz haec nauz suans nix haec feax. Mengz nauz xic aul daail.” Guaslangl bux deec bail degt daus xic ndaix laail geh, yac banl haec leeuxboz laail geh.

Lix ngonz ndeeul deel bail degt daus. Deel rooxnyiel jongs duez rog dungx nauz: “Rauz lac deez jiez nix bais. Haamh nix ramx lac dumh guaagt jiez nix.” Deel rooxnyiel duez rog nauz dangnix xic sooh seedt bail dangz mbaanx riangz leeuxboz nauz: “Rauz aul bianh deez jiez nix nyamz neeh, haamh nix ramx lac dumh jiez nix bais!” Mizguanc leeux mbaanx miz sins deel. Boz wenz ndael mbaanx deec nauz: “Hohrauz xeeuh daaml xaauz qyuh dangz xez nix duc miz lix yaangzmaz suans. Mengz nauz haamh nix hac ooh suans, wooil yaangzmaz aul ooh suans, mengz xic aul nauz ooh dauc rooh guehleeux, leeuxboz xaaux ndil bianh.”

Deel reenl leeuxboz miz sins deel naaus. Deel xic lenh gaais suans deel jaus duez ngeaz deec haec leeuxboz guehleeux. Lenh leeux deel xic bians banz ndaagt rinl. Mbanh nix leeux

mbaanx xic sins deel. Leeuxboz ndingh daic ndingh mbeadk
ramx dal bianh deez jiez deec. Haamh deec ramx xic dumh
guaagt jiez deec jiezraaix bais. Xaab baiz deec dauc wenz
beangz deec idt bil duc bail jings goonc rinl deec.

Menllungx Bail Genzmbenl

Meanh xaux, lix bux legsaail ndeeul, xooH deel nauz gueh Menllungx, deel uax laail, deel maaic el feax. Lix mbaanx ndeeul qyuh byaail bool, wenz mbaanx deec lac bail jiez laez, duc rongz dauc dinl bool. Idt hoobt dangz ngonz jeex, Menllungx xic aangh laauhhoh, haaix ooh miz genl hauxngaiz xic bail dinl bool xac feax daaus jeex.

Dangz baanl xez feax rungl hauxxauz deec, xic lix wenz daaus jeex laail. Menllungx xic el baiz bux baiz bux henc bail mbaanx. Xez deel el bux wenz henc ndooil deec, ndangh laauhhoh, lumc duez max rail nic. Bux wenz naagt saauh laez deel duc el ndaix, henc ndooil haaix gaais reedt xoonh leeux. Xaamx bux deel el deec nauz: “Menllungx, mengz naais laail, dies gul gah byaaic ieh bais.” Menllungx xic hooznyaz danghdauz leeux, dies dod bux deec xus jaangl ndooil. Sooh daaus seedt bail dinl bool, ndingh homcsomx ndingh bail, xic daaus el bux moos. Menllungx gueh dangcnix ndaix feangh bil.

Lix daaus ndeeul, deel el baus ndeeul, raanz baus deec
guaangl laail, deel xic gohsiz Menllungx, xic riangz
Menllungx nauz: “Menllungx, mengz bail riangz gul, gul xic
haec mengz idt ngonz el gul, banz miz?” Menllungx haanl:
“Banz las, mengz miz haec gacloox gul leex!” Mbanh nix,
Menllungx xic bail qyuh raanz baus deec, ngonz ngonz el
baus deec miz dangx xez laez, miz haec el xic hooznyaz. Baus
deec soonl deel gueh yaangz ndooil, deel miz gueh.

Lix ngonz ndeeul, baus deec ndiabk, haec deel bail daail xic
ndil geh. Deel xic xiez Menllungx bail aul fenz, bail dangz
bool lix raans ndeeul saangl laauhhoh, byaail raans deec lix
gool faix ndeeul banz saaml jis. Baus deec nauz haec
Menllungx aul soongl gal bail duh soongl jis baaih lac, aul
soongl fengz gaml jis baais genz. Baus deec riangz Menllungx
nauz: “Gul nauz haec mengz gueh yaangzmaz, mengz xic
gueh yaangz deec noox.” Menllungx xic ngaag jauc. Baus
deec xic nauz: “Menllungx xuangs soongl gal.” Menllungx xic
xuangs soongl gal. Baus deec daaus nauz: “Menllungx xuangs
soongl fengz.” Menllungx xic xuangs soongl fengz. Menllungx
xic dogt riangz raans bail lac. Guas ndaix neec ndeeul, lix
duetz sianl ndeeul dez Menllungx bail genzmbenl.

Baus deec yius reenl xic seedt bail raanz heeuh legsaail deel dauc, lenh gaais suans deec haec leg deel gacnyiel. Ieh baus deec xic soongl gal duh soongl jis faix baaih lac, soongl fengz gaml jis faix baaih genz, xic nauz haec leg deel heeuh. Leg deel xic heeuh: “Menllungx xuangs soongl gal.” Baus deec xic xuangs soongl gal. Leg deel daaus heeuh: “Menllungx xuangs soongl fengz.” Baus deec xic xuangs soongl fengz. Baus deec xic dogt riangz raans deec bail lac, bail dangz lac deec xic menh leeux, miz lix duez maz dauc jaus deel.

Gacloox Bux Laaux

Lix biz bool saangl ndeeul, biz bool deec lix faix lix nyal laabt leeux. Lix xooix ndeeul idt ngonz xuangs yuangz bail ndael bool deec. Bail dangz bool, yuangz bail saaml baaih sis mianh genl nyiec, deel xic nangh gogt faix. Ndael bool gahdamx lix deel ndooil, laail ngonz laail, deel xic mbeah bais.

Lix ngonz ndeeul, xooix deec xuangs yuangz bail dangz bool, deel nih dangz yaangz ndeeul aul dauc nauz gueh iel mbeah. Deel xic aul gacloox nauz gueh reenl langx. Ieh xic deel bail byaail bool heeuh: “Langx dauc geh, langx dauc geh! Dauc nyamz neec geh!”

Hoh wenz qyuh ndael jaangl dongh gueh hoongl deec rooxnyiel xooix deec heeuh xic ducseedt laaux, leeuxboz soohnyaangh seedt bail ndael bool. Bux ndeeul byah bail baaih ndeeul ral langx, mizguanc leeuxboz duc ral miz reenl duez langx. Gaais ngauz duez langx deec duc eemh miz reenl.

Boz gueh hoongl seedt bail hams xooix deec: “Jacbanh deg miz deg mengz heeuh nauz gueh reenl langx?” Xooix deec haanl: “Deg has.” Boz gueh hoongl deec hams: “Langx qyuh jiez laez?” Xooix deec nauz: “Langx reenl hohsul dauc, xic seedt deeuz bais.” Hoh gueh hoongl deec xic daaus bail gueh hoongl bais. Xooix daez yuangz reenl hohdeec il deel gacloox, deel xic aangh leeux. Hohdeec deeuz ieh, deel gah qyuh jiez deec reeul gaais ndonx jeedt leeux.

Guas ndaix jic ngonz, xooix deec qyuh ndael bool daez yuangz mbeah, deel daaus nih dangz gacloox feax ndilmaiz, deel daaus heeuh: “Langx dauc geh, langx dauc geh! Dauc nyamz neeh geh!”

Boz qyuh jaangl dongh gueh hoongl rooxnyiel xooix neec deec heeuh, daaus ducseedt laaux, leeuxboz soohnyaangh dez gues, dez guaz seedt bail bool. Mizguanc dungxlumc daaus goons deec, gaais ngauz duez langx deec duc miz reenl. Hohdeec hams xooix neec deec, nauz: “Jacbanh deg miz deg mengz heeuh nauz reenl langx?” Xooix deec nauz: “Deg has.” Hohdeec nauz: “Langx daaus deeuz baic maz?” Xooix deec haanl: “Deeuz bais.” Hoh gueh hoongl deec daaus

dez mbahyaangz rongz bool dauc lac bais. Xooix daez yuangz deec daaus reeul gaais dungx jeedt leeux.

Daaus guas ndaix jic ngonz, xooix deec daaus qyuh ndael bool daez yuangz, daaus heeuh moos, hoh gueh hoongl rooxnyiel xic daaus bail nyamz leeux. Baiz nix xooix daez yuangz xic reeul daangs nac hohdeec, nauz: “Hohsul daaus il gul gacloox bais!” Leeuxboz xaax rooxheeh deel gacloox, xic hooznyaz leeux. Leeuxboz xic daaus bail gueh hoongl bais.

Lix ngonz ndeeul, langx dauc jiezraaix bais. Xooix daez yuangz deec ndillaaul seens leeux, soohnyaangh heeuh hoh wenz qyuh jaangl dongh gueh hoongl deec, nauz: “Dauc nyamz neeh geh, langx dauc bais!”

Hoh wenz qyuh jaangl dongh gueh hoongl deec rooxnyiel xooix deec heeuh, xic jaailnauz deel daaus gacloox, xic miz lix faangx laez gacnyiel deel. Duez langx reenl miz lix bux wenz laez dauc, deel xic seedt bail jaangl bongc yuangz, haab yuangz daail leeux bais. Xooix daez yuangz deec daic ngas rianh leeux, daic yac miz lix yungh, yac miz lix bux laez dauc jaus deel bais.

Duez Gugt Heeuc Ooh

Qyuh ndael ndongl faix, bux laez duc rooxheeh heeuc duez gugt ndangh laauhhoh. Duez lingz nauz: “Hax, faix laaux saauh laez deel duc gaadt ndaix, deel gaadt mail faz lumc bux genl mianl nic, ndillaaul laauhhoh.” Duez ducrec laaul gaais ndonx rodt leeux. Mizguanc duez faanz nauz: “Hohsul laaul heeuc gugt, gul miz laaul. Hohsul eemh, gul haslix aul heeuc deel ooh guehleeux.” Miz lix faangx laez xangcsins duez faanz. Duez ducrec hal duez lingz reeul duez faanz, nauz deel boos, miz waaihnac neec laez. Duez faanz nauz: “Miz sins, hohsul xic eemh gul.” Duez faanz xic boongx aagt byaaic deeuz bais.

Deel bail ral duez gugt jiezraaix, deel ndaix ndaagt daih diangz bail, riangz duez gugt nauz: “Aih, mengz bux laaux, gul ndaix diangz dauc haec mengz, waanl laauhhoh.” Duez gugt fih ndaix genl diangz daaus laez. Deel genl need diangz ndeeul ieh, xic nauz: “Waanl laauhhoh.” Guaslangl duez faanz xingh songs diangz dauc haec deel, deel genl need leeux need moos, ninz duc aul diangz omh xus bas.

Xez deec, duez raaih dauc daanz duez gugt nauz: “Aih, mengz genl diangz laail yac miz xaadt heeuc, heeuc banz ndungx ges. Mengz ngaix duez faanz gacloox bais.” Duez gugt xic hac xaadt heeuc, duez faanz daaus dauc dangz, nauz: “Aih, mengz xaadt heeuc gaais diangz ndael heeuc deec deeuz leeux, xic jaais laail bais.” Mizguanc raaih nauz: “Genl diangz laail heeuc waaih.” Duez faanz daaus gacloox deel, nauz: “Heeuc bux ndooil laaul diangz, heeuc mengz ndangh dangcnix, dangz mail faz duc gaadt gons, haslix laaul diangz maz?” Duez gugt haanl aangh leeux: “Ex, mengz nauz ndaix hoz, gul ngonz ngonz genl diangz, gul miz laaul banz ndungx, gul yac miz xaadt heeuc.”

Guas ndaix jic ndianl, heeuc deel jeedt laail ngas rianh leeux. Deel bail raanz duez max, riangz max nauz: “Xaaml mengz baangl gul logt heeuc ndungx gul ooh nyamz neeh bais.” Duez max gueh dangclaez aul heeuc ndael bas duez gugt ooh mus, deel miz gaamc baangl. Duez gugt daaus bail ral duez waaiz baangl, mizguanc waaiz reenl deel xic soohnyaangh seedt deeuz.

Duez gugt jeemc fog leeux, jeedt laail xic xingh ngas: “Aih yooh! Aih yooh! Jeedt dangs daail bais! Bux laez baangl gul

logt heeuc ooh, gul haec deel gueh sais.” Xez deec, duez faanz dauc dangz, reeul xus deel, nauz: “Dauc gul baangl mengz logt heeuc ndungx las!” Duez gugt bas fog leeux, nauz: “Doolsiel, doolsiel.” Duez faanz sooh qyox bas duez gugt xic nauz: “Hax, heeuc mengz aanh aul logt guehleeux bais.” Duez gugt bas mbidt leeux, ndingh goongz ndingh haanl: “Ex, damcdoos miz jeedt, logt guehleeux xic logt bais.”

Duez faanz logt seenc bail seenc, dangz seenc saadkbyaail, duez faanz gueh dangclaez logt yac logt miz ndaix. Duez faanz xic ndaix deez mail ndeeul, aul jauc ndeeul headk heeuc gugt, jauc ndeeul headk xus gool faix, ieh xic aul xuangssal dies xus heenz riez gugt. Deel daz leenz, xuangssal xic dees, gugt ndillaaul xic seedt, seenc heeuc saadkbyaail xic mboodk bais. Duez gugt aangh leeux, haslix doolsiel duez faanz nauz: “Mengz sooil ndil! Doolsiel mengz baangl gul! Doolsiel! Doolsiel!” Jongs duez ndooil xic hanh duez faanz, nauz: “Mengz xaangh baih jiezraaix, haaix ooh gugt gacnyiel mengz gueh xingh.” Gugt xic aul haec faanz gueh sais, guanhsaaah gaais jongs duez ndael ndongl deec guehleeux.

Bux Guaangl Saml Mauz

Meanh xaux lix soongl bixnuangx, bux ndeeul guaangl, bux ndeeul hooc. Dangz xiangl, bux guangl deec xic lix mul gac, yac lix mbahyaangz laail. Bux hooc deec miz lix yaangz maz, hac dangz xiangl xic dez raabt ramz bail jeex gaail. Dez bail dangz baangx dah haamc goos dangz jincjaangl, deel byaaic miz ndilriz xic byaadk haaix ramz gomc bail ndael dah leeux. Deel ruangh laail xic nangh heenz dah daic.

Daic ndaix gus ndeeul, lix baus jees mumh haaul meeuz yac haaul ndeeul byaaic dauc dooisnac deel, hams deel: “Mengz guehmaz nangh jiez nix daic mus?” Deel xic nauz: “Gul hooc laail, miz lix xeenz xex yaangz maz haec leg gul guas xiangl, gul xic aul neec ramz bail gaail, xic byaadk haaix ramz gomc leeux bais, gul ruangh xic daic ndaic las.”

Baus jees deec xic gohsiz deel, dez deel bail ndael gaamc aul nganz, ndaix raabt nganz ndeeul haec deel, deel dez dauc raanz aangh leeux. Deel riangz leg laaux deel nauz: “Bail riangz booh laaux aul xangh dauc rauz xangh nganz.” Leg deel bail dangz, xic riangz booh laaux deec nauz: “Booh

laaux, diec gul nauz gul dauc riangz mengz aul xangh bail xangh nganz.” Booh laaux deel nauz: “Xangh yaangzmaz nganz mus? Aul ndeenl hauxfangx ndeeul haec deel.” Meeh laaux deel ndaix hauxfangx haec deel, ieh xic xaus deel daaus bail raanz.

Bux hooc deec daaus xaus xooix leg daz ngih deec bail. Xooix daz ngih deec bail dangz, riangz booh laaux deel nauz: “Booh laaux, diec gul nauz gul dauc riangz mengz aul xangh bail xangh nganz.” Booh laaux deel yac miz sins, daaus nauz: “Gueec aul doonh boongs ndeeul haec deel,” ieh xic xaus deel daaus bail raanz.

Baiz nix bux hooc deec daaus xaus xooix daz saaml deec bail, riangz xooix deec nauz: “Baiz nix, booh laaux aul mbahyaangz haec mengz, mengz nyac aul, aul xangh dauc rauz xangh nganz nyamz neeh.” Baiz nix xooix daz saaml bail dangz, riangz booh laaux deel nauz: “Booh laaux, diec gul nauz gul dauc riangz mengz aul xangh bail xangh nganz.” Booh laaux deel miz sins xic daaus nauz: “Gueec aul neec nooh ndeeul haec deel.” Xooix deec nauz: “Gul miz aul nooh, aul xangh bail haec diec gul xangh nganz.” Mbanh nix booh laaux deel xic aul xangh haec bais, ieh xic dauc

riangzlangl qyox, reenl lix raabt nganz jiezraaix. Laaux goc deec xic hams laaux nuangx deec, nauz: “Mengz bail jiez laez ndaix nganz laail dangcnix mus?” Nuangx deel xic baih gaais suans deec haec deel guehleeux.

Mbanh nix, goc deel xic riangzlangl gaais haaus nuangx deel nauz deec bail gueh. Dez raabt ramz bail dangz baangx dah xic xangcih byaadk haec ramz gomc bail ndael dah, ieh deel xic nangh jiez deec daic, baus jees mumh haaul deec daaus byaaic dauc hams deel. Deel xic riangzlangl gaais haaus nuangx deel nauz deec, gacloox baus jees deec. Baus jees xic dez deel bail ndael gaamc aul nganz. Bail dangz ndael gaamc reenl nganz laail, deel xic aangh leeux. Baus jees deec nauz: “Xicmaaic mengz aul.” Deel aul saauh laez yac miz hoz saml. Baus jees deec reenl deel saml mauz xic hac haais deel, mizguanc miz nauz haec deel rooxheeh. Deel dez raabt nganz ooh basdul gaamc, xez deel jazjaz dangz basdul gaamc deec, dul xic haabt, jamh ndaix ndaagt eeul deel, deel xic daail bais.

Legmbegt Nail Ndinghal Duez Mal

Meanh xaux lix baus jees ndeeul hal yah jees ndeeul, hohdeec miz lix leg. Lix ngonz ndeeul dauc nail, hohdeec ooh bail rooh yius reenl jongs leg raanz feax guehxamz nail. Baus jees deec honc ndaagt nail nauz: “Xaamx rauz lix xooix legmbegt ndeeul haaul lumc ndaagt nail nix xic ndil laail bais.” Yah jees deec gaml ndaagt nail deec waanz his bil jauc leeux.

Baus jees deec ndaix ndaagt nail deec bail raanz xus ndael gaangl, ndaix bangz gomh bas gaangl, dies xus bas dulxuaangc. Dalngonz ooh dauc, ieh ndaagt nail qyuh ndael gaangl deec xic neeh neeh xas, yac gaangc haaus. Baus jees deec hal yah jees deec rooxnyiel lix hingl gaangc, hohdeec geadt gaais bangz gomh bas gaangl deec qyox, ndael deec lix xooix legmbegt ndeeul, haaul lumc nail nic. Xooix legmbegt deec riangz hohdeec nauz: “Gul deg nail raix banz, ndaadk xeeus gul rauc bais, xaaml aul gul ooh bail rooh bais.” Baus jees deec hal yah jees deec aangh laauhhoh. Baus jees deec aul mbugt sues deel, yah jees deec gueh wasbeah haec deel. Mbanh nix xooix leg nail nix neeh neeh mac laaux, yac ndiljaiz yac guaail.

Baus jees deec hal yah jees deec xiangx duez mal ndeeul daez raanz ndil laauhhoh. Lix ngonz ndeeul, duez fuxlih gacloox duez mal, xic gueh lumc banz bingh nic dauc ral duez mal deec. Deel xaaml duez mal deec haec deel bail hooh duez baus yah deec gueh rauc neec ndeeul. Duez mal deec miz roox yah deec jangl soongl duez gais xus ndael deec, deel xic haec fuxlih bail ndael hooh duez deec. Fuxlih haab soongl duez gais deec daail, ndaix bail raanz deel bais. Baus jees deec hal yah jees deec hooznyaz duez mal, xic laih deel deeuz. Xooix legmbegt nail deec xic ruangh duez mal deec laail.

Ndianl rauc dangz bais, buxduz xooix deec dungx xiez bail ndongl faix guehxamz. Baus jees deec hal yah jees deec miz xuangssaml, mizguanc xooix deec haslix aul bail. Jongs nyeezneec deec bail dangz ndongl faix guehxamz ngaeh, yaangmaz duc lumz leeux. Guaslangl, xooix legmbegt nail deec qyuh ndongl faix miz roox ronl dauc raanz. Deel daic ral buxduz deel, ral miz reenl bux laez. Deel binl bail byaail gool faix ndeeul, heeuh hingl laaux, duez langx byaac dauc riangz deel nauz: “Rongz dauc lac las, gul songs mengz bail raanz!” Deel nauz: “Gul miz riangz mengz bail, gul laaul

mengz, mengz aanh genl gul.” Duez langx byaaic deez bais. Ieh xic lix fuxlih dauc, riangz deel nauz: “Rongz dauc lac, gul songs mengz bail raanz!” Deel yac miz riangz fuxlih bail. Fuxlih xingh hoobt ngoomx gogt gool faix deec bail mal bail mal, nih gueh dangclaez gacloox deel rongz dauc lac.

Xez deec, duez mal qyuh ndongl faix waus. Xooix legmbegt nail deec rooxnyiel xic heeuh duez mal deec, nauz: “Gul qyuh jiez nix, gul deg legmbegt nail!” Fuxlih rooxnyiel hingl mal, xic gueh raag deez bais. Xooix legmbegt deec rongz guas byaail faix dauc lac, duez mal deec seedt dauc riez deel aangh leeux, ieh xic songs deel bail raanz.

Baus jees deec hal yah jees deec yius reenl duez mal dez legmbegt deec dauc raanz, hohdeec xic aangh leeux. Hohdeec yac raux duez mal deec, aul gaais ndil haec deel genl, xic haec deel qyuh raanz hohdeec guehnaaus.

Langx Hal Xeedt Duez Yuangz Neec

Meanh xaux, lix meeh yuangz ndeeul, lix xeedt duez yuangz neec, deel jaiz hohdeec laail. Lix ngonz ndeeul, deel hac ooh bail rooh ral mbahyaangz genl, deel xic heeuh xeedt duez yuangz neec dauc, riangz hohdeec nauz: “Gul hac ooh bail rooh bais, hohsul qyuh raanz haabt dul ndilriz noox. Xaamx duez langx dauc dangz, gaaisdeec, dangz gaais benl hohsul deec deel duc aul genl guehleeux. Duez langx deec guaail laail, ganx gacloox, mizguanc hohsul rooxnyiel hingl jongl, yius reenl dinl deel foonx, xic sooh rooxnac deel bais.” Jongs duez yuangz neec nauz: “Meeh, mengz xuangssaml bail, hohdul rooxheeh ndais.” Mbanh nix meeh yuangz deec xic xuangssaml bail bais.

Meeh yuangz deec bail miz saauh laez naanz, lix langx dauc roos dul, heeuh nauz: “Jongs legneec, haail dul, meeh sul daaus dauc dangz bais, ndaix mbahyaangz dauc haec hohsul.” Mizguanc jongs duez yuangz neec rooxnyiel hingl jongl, xic rooxheeh deg langx. Hohdeec haanl nauz: “Hohdul miz haail dul, mengz miz deg meeh hohdul, meeh hohdul

hingl unh ndilnyiel. Mengz hingl jongl, mengz deg duez langx.”

Langx bail jiez gaail mbahyaangz deec, xex ndaix yaangz iel ndeeul genl, haec hingl deel gueh unh geh. Ieh deel daaus dauc roos dul hohdeec, heeuh nauz: “Jongs leg, haail dul, meeh sul dauc dangz bais, ndaix mbahyaangz dauc haec hohsul.” Mizguanc jongs duez yuangz yius reenl mbal dinl foonx deel deec, xic haanl nauz: “Hohdul miz haail dul. Dinl mengz foonx, mengz deg langx.”

Langx daaus seedt bail dangz jiez gaanc haux menh deec riangz bux deec nauz: “Aul neec haux menh byaaus xus genz dinl gul.” Bux gaanc haux deec ndael saml nih: *Duez langx nix hac bail gacloox feax*, xic miz baangl deel xus haux menh. Mizguanc langx nauz: “Xaamx mengz miz xus, gul xic genl mengz.” Bux gaanc haux deec ndillaaul, xic baangl deel xus genz dinl gueh haaul.

Mbanh nix duez langx daaus daz saaml bail dangz basdul raanz jongs duez yuangz neec deec, riangz hohdeec nauz: “Haail dul haec gul, meeh dauc dangz bais, ndaix mbahyaangz guas ndongl faix unx deec dauc haec hohsul.”

Jongs duez yuangz neec haanl nauz: “Yangx dinl mengz dauc haec hohdul gauc goons, gauc mengz deg miz deg meeh hohdul.” Langx xic yangx dinl bail haec hohdeec gauc, hohdeec yius reenl dinl haaul, jaailnauz duez langx deec deg meeh hohdeec jiezraaix, xic haail dul.

Hohdeec reenl duez langx, xic ducseedt laaux, sooh seedt bail ndiex. Duez daz idt seedt bail lac xoongz, duez daz ngih bail lac xuaangz, duez daz saaml bail ndael ramx, duez daz sis bail jiez guaih haux deec, duez daz hac bail lac benz ras nac deec, duez daz rogt bail ndiex baaih langl ringc, duez daz xeedt juangh bail ndael eengl. Mizguanc duez langx ral reenl hohdeec, xic baiz duez baiz duez ndunx bail ndael dungx. Gah laams duez qyuh ndael eengl ramx deec ndooil, deel ral miz reenl. Langx genl imh bais, xic deez jiez deec, bail gogt gool faix, ninz genz nyal ngaeh bais.

Meeh yuangz dauc dangz raanz, reenl mbahyaangz ndael raanz goongl dees leeux. Deel ral miz reenl xeedt duez leg deel deec. Deel baiz duez baiz duez heeuh, heeuh dangz duez daz xeedt deec, xic lix hingl ndeeul haanl guas ndael eengl dauc, nauz: “Meeh, gul qyuh ndael eengl, aul gul bail rooh.” Meeh yuangz deec jaus duez yuangz neec deec dauc rooh, ieh

duez yuangz neec deec xic nauz gaais suans duez langx dauc deec haec meeh yuangz deec.

Meeh yuangz hooznyaz laail, riuc ndaix fah mid ndingh daic ndingh bail ral duez langx deec. Bail dangz xic reenl duez langx qyuh gogt faix ninz jeenl rianh leeux. Deel neeh neeh qyox ndilriz, yius reenl dungx duez langx deenz laauhhoh, ndael dungx yac xas. Meeh yuangz deec xic ndaix mid neeh neeh bas dungx duez langx deec, ndaix leg deel ooh, ieh xic jibt rinl xus ndael dungx duez langx deec mooz leeux, daaus dings basmbaadk deec dungx xus.

Mbanh nix duez langx ninz imh, xic runs dauc, hooz hes ramx laauhhoh, xic bail bas mbooh ral ramx genl. Gaais rinl qyuh ndael dungx deel deec xic dungx ndobk gog gag leeux, deel nauz: “Ndael dungx gul guehmaz gog gag leeux nis, guehmaz banz dangcnix mus?” Deel bail dangz bas mbooh hac genl ramx, xic dogt bail ndael mbooh. Ndael dungx lix rinl naagt laail, deel xic xaml bail ndael ramx daail bais.

Jongs duez yuangz xic seedt dauc jiez mbooh ramx deec heeuh aangh leeux, nauz: Duez langx dogt bail ndael mbooh

daail baic geh! Duez langx dogt bail ndael mbooh daail baic
geh!”